

Date - 04/09/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Larsap General (Rtd) Vijay Kumar Singh a’n khawvel hmasawn zelah mipui hriat tur thudik leh belhchian dawn pekchhuah a pawimawh tih a sawi.
- 2. Mualthuam North tualthihna avanga man Lunglei Police Custody atanga tlan chhuak Denghmingthanga chu nimin tlai dar 4:30 khan man a ni.
- 3. Irrigation & Water Resources changtu Minister Pu PC Vanlalruata’n mumal zawka ruahtui khawl anih theih nan sawrkarin hma a la mek tih a sawi.
- 4. Sawrkar laipui chuan Foreign Contribution (Regulation) Amendment Bill 2026 ennawn tur member 31 awmna Joint Parliamentary Committee a din.



GOVERNOR

Larsap General (Rtd) Vijay Kumar Singh a’n khawvel hmasawn zelah mipui hriat tur thudik leh belhchian dawn pekchhuah a pawimawh tih a sawi.

Nimin-a Mizoram Information Service Officer thar kum 2026 Batch te nen Lok Bhavan-a an inkawmna ah he thu hi a sawi a, Larsap chuan khawvel hmasawn zelah social media in mipui nun a luah hneh hle tiin thu dik leh rintlan puanzar a pawimawh thu a sawi a, thu lengvak aia belhchian dawl nghak hram zel turin MIS officer thar te a fuih a ni.

Larsap chuan Orientation and Exposure Programme nei mekte MIS Officer thar te chu mipui nena inthlunzawmna tha siam ngaipawimawh tura chahin ngaihtuahna thar leh danglamna thlen thei nih tum tur leh rilru fim pu chung a thil thar zir duhna neia intuaihriama tawng hrang hrang thiam tum turin a chah a. Mipui tana rawngbawl an ni tih hre reng chung a hna thawk tura chahin, thiamna hrang hrang an neihte chu Mizoram tana tangkai taka an hman chhuah theih nan duhsakna a hlan a ni.



ILP

Chief Minister Pu Lalduhoma kaihhruaiin nimin khan Mizorama khualzin pung zelah ILP kenkawh dan chungchang sawiho a ni.

CM Conference Hall-a thutkhawmah hian Mizorama khualzin pung zelin a ken tel thil hrang hrang leh ILP fee chungchang te leh Mizoram Registration of

Tourist Trade Rules 2020 hnuaia registration chungchang bakah phal chin aia rei chamhote man chhuah dan tur leh ILP Apps chungchangte an sawi a. Home Department nena la thlirho leh tur a ni ang.

Hetihlai hian Assembly fur thutkhawm zawh taka ziaka zawhna a chhanna ah Home Minister Pu K. Sapdanga chuan kum 2024-2025 inkarah ILP 2,78,087 (Nuai Hnih Singsarih Sangriat Sawmriat Pasarih) pek chhuah a ni a ti a, ILP pek chhuah atanga sum hmuh zawng zawng chu cheng Rs.8,80,67,100/- (Vaibelchhe Riat Nuai Sawmriat Sing ruk Sang Sarih Za) a ni a ti bawk.

<><><>

MURDER ACCUSED RECAPTURED

Mualthuam North tualthihna avanga man Lunglei Police Custody atanga tlan chhuak Denghmingthanga chu nimin tlai dar 4:30 khan man a ni.

Hemi chungchangah hian nizan dar 11 leh a chanve pelh hret khan Mizoram police chuan thuchhuah siam nghalin, Denghmingthanga hi Vanhne leh Thuampui inkar ram a mi thlamah man a ni a, Lunglei lamah phurh chhoh niin, a hriselna dinhmun endik a nih hnuaah Judicial Magistrate hma a hruai a ni a, Judicial Custody-a dah luh nghal a ni.

Denghmingthanga hi September ni 1 zing dar 1:00 khan Lunglei Police Station atangin a tlan bo a, a tlan bo tih hriat a nih velah Lunglei Police lamin zawn chhunzawm nghalin, an ni bakah hian second battalion MAP, YMA branch hrang hrangte leh Local Council leh VDP Unit hrang hrangten chhun leh zan zawmin an zawpui nghal bawk a ni.

Mizoram Police chuan tang tlanbo zawn kawngah khawtlang mipui leh tlawmngai pawl hrang hrangte hnenah lawmthu an sawi bakah hun lo la kal zel turah thubelh chian dawl lo thehdarh lo turin mitin an ngen thu an thuchhuah siamah hian an tarlang bawk.

<><><>

MUANPUII SAIAWI

Sawrkar laipui chuan High Commissioner of New Zealand ni mek Muanpuii Saiawi chu High Commissioner to the Republic of Vanuatu ni turin a ruat.

Republic of Vanuatu a Muanpuii Saiawi High Commissioner atana ruat chungchangah hian sawrkar laipui chuan Vanuatu bakah Pacific thliarkar ram dangte nen thawhhona tha zawk an neih beisei a ni a, Muanpuii Saiawi hi ramdang nena thawhho thiam tak niin India tan hlawkna tam tak a thlen dawn a ni.

Muanpuii Saiawi hi Indian Foreign Service kum 2005 Batch a ni a, India Embassy hrang hrang Republic of Korea, Japan leh Israel ah te alo thawk tawh a, kum 2016 January ni 20 khan India’s High Commissioner to New Zealand atan ruat a ni a, Mizoram mai bakah hmarchhak bialin Pacific thliarkara India thuneitu sang a nei hi thil chhinchhiahthlak tak a ni.



MIZORAM TRIBAL FILM FESTIVAL 2026

Ministry of Tribal Affairs hnuaia hmalakna Mizoram Tribal Film Festival 2026 chu Mizoram-ah neih a ni dawn.

Mizoram Tribal Film Festival Working Committee vawiina thukhawm chuan Mizoram Tribal Film Festival 2026 hi November ni 4 atanga ni 6 inkara neih turin a ruahman a, a hmun atan Vanapa Hall, Lianchhiari Run Mini Theatre leh TRI, Kelsih ah Film-te hi chhuah tum a ni.

He Film Festival ah hian film siam lama tui te tan Short Film Competition leh Reels making competition buatsaih a ni dawn a, State pawn atangin Tribal Filmmaker thenkhat sawm an ni dawn a, Film Industry lama tuimi te tel turin Art & Culture Department chuan a sawm a ni.

He Film Festival hian Tribal Filmmakers chawisanga an dinhmun sang zawka dah a nih theih nan hma a la dawn a. Mizo Film/Documentary, Short Film, leh Reels siam thin te a tam thei ang ber tel turin a sawm a. Inkaihhruaina hrang hrang te hi a kimchang zawkin tlangzarh a la ni ang.



KOLASIB END

Kolasib Excise & Narcotics department chuan thla liamta August 2026 chhung khan MLP Act hnuaiah thubuai 336 ziaklutin dan bawhchhia hi mi 336 an man.

Tunhnaiah District Level Narco Coordination Centre (NCORD) Committee, Kolasib Police Station-a neiha tarlan anih danin Asst Commissioner of Excise & Narcotic, Kolasib District chuan August thla chhung khan tualchhung siam zu litres 341.2 an man a, Sap zu thanhem tak leh beer an man tel a, Zu an man zawng zawng hi tualchhung rate a chhutin cheng nuai 2 sing 42,840/- man hu a ni.

Kolasib Excise hian Heroin gram 24.4 man telin Narcotics Control Bureau (NCB) in an chhut danin cheng nuai 4 sing 84,000/- man hu a ni bawk.



NH 02

Serchhip District Bawrhsap Pu Paul L. Khuma kaihhruaiin National Highway 02 kawng siama mawhphurtu hrang hrang ten nimin khan hmasawna an thlir ho.

NH02 kawng chungchanga thutkhawmah hian kawng siam that lailawk hnathawh zawh takte thlirletna niin fur ruahtui tlak zawh hnua kawng siam chhunzawm dan tur sawiho a ni bawk.

Bawrhsap chuan kawng siamtu NHIDCL leh Contractor te chu kawngpui siam hna ngaihthah leh hnathawh that loh chu mipui pawisawina leh mipui nunna derthawnawma dahna a nih thu sawiin hna an thawk tha lo a nih chuan BNSS leh

DM Act hmanga danin thuneihna a pek angin khawng taka hmalak a nih tur thu a sawi a ni.

<><><>

KVIC

Khadi & Village Industries Commission, Aizawl buatsaihin Mamit District-a West Phaileng Higher Secondary School ah sawrkar laipui hmalaknaa kutkawih eizawna hrang hrang inzirtirna hun hman a ni.

Nimina zirhona hi Peoples Education Programme hnuaiah buatsaih niin zirlaiten kutthemthiamna hmanga eizawna an neih theihna tur leh hmalak dan tur an hriat theih nana buatsaih a ni.

KVIC Aizawl Executive Pu Safiyan Hayath chuan KVIC Scheme hmanga khuai khawitute, electrician, plumber te leh eizawna bultan mek dangte tana hamthatna hrang hrang sawifiahin zirlaiten an hman tangkai dan tur hrang hrang a hrilhfiyah a ni.

He Peoples Education Programme pual hian zirlai naupangten Debate Competition leh Essay Writing Competition hmanga in elin hun hlawkthlak tak hman a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.
-/////-

<><><>

CEO VISITS CHAMPHAI

Mizoram Chief Electoral Officer Pi Garima Gupta chuan nimin khan Champhai tlawhin mawhphurhna hrang hrang neitute nen inkawmin SIR 2026 kalpui dan an thlir ho.

Pi Garima Gupta chuan Champhai chu District zinga che tha ber pawl an ni, a ti a. Thawktuten Electoral Roll dik leh felfai neih a nih theihna tura phur taka an thawhhona avangin lawmthu a sawi a ni.

SIR Draft Electoral Roll hi July ni 7 khan tlangzarh a ni a. Draft Electoral Roll ah hian Champhai District chungah voter 56,412 an awm a ni.

<><><>

TOURISM

Tourism Minister Pu Lalnghinglova Hmar chuan nimin khan Homestay 199 sakna tur a tlangzarh a, Tourism Deparment buatsaih Empowering Community Homestays Ceremonial Launch & Capacity Building (Under BANA KAIH, PM-JUGA and CSR Initiatives) Programme ah tlangzarhin Heng Homestay 199 atanga 100 sakna tur sum cheng nuai 540 hi Mizoram Flagship programme Bana Kaih atangin hmuh a ni a. He Bana Kaih Homestay hian MLA constituency 40 a huam ang.

Homestay din tura thlante hi Progress Partner tih an ni a, Sum hi October thla-ah release tan tur a ni. Homestay 89 sakna tur sum cheng nuai 500 hi PM-JUGA hi DA-JGUA scheme atanga hmuh a ni a. Hei hi tribal homestay scheme a ni. Khaw 12 a huam ang. Homestay siam tura thlan chhuahte hi beneficiary tih an ni. Sum hi October atangin release tan tur a ni.

Homestay dang 10 sakna tur sum cheng nuai 49 hi Indian Railway Finance Corporation Ltd te CSR atangin dawn a ni a. Thenzawl leh Serchhipah te sak an ni ang. Hemi hnuaia homestay bik hi MTDA in a enkawl ang.

<><><>

FCRA

Sawrkar laipui chuan Foreign Contribution (Regulation) Amendment Bill 2026 ennawn tur member 31 awmna Joint Parliamentary Committee a din. He committee hi Lok Sabha MP Sanjay Jaiswal chuan a ho dawn a. Member langsar zingah Lok Sabha atangin Bhartruhari Mahtab, Tejaswi Surya, Nishikant Dubey, A. Raja leh Supriya Sule te an tel a. Rajya Sabha atangin Harsh Vardhan Shringla, Sanjay Kumar Jha, Praful Patel leh Menaka Guruswamy te an tel a ni.

Puan tawh angin thla hmasa August ni 12 khan Parliament inhnihte chuan FCRA Bill,2026 hi ennawn turin JPC kuta dah an rel a. He bill hi FCRA,2010 siamthatna tur niin langtlang leh rintlak zawka ramdang atanga tanpuina hman dan tur dan a ni.

<><><>